

宗玄集

吴筠

文硕阁

wenshuoge.com

目录

关于我们	3
提要	5
宗玄集原序	6
宗玄集卷上	7
宗玄集卷中	10
宗玄集卷下	22
宗玄集别录	30
吴尊师传	40
宗玄集原序	41
宗玄集跋	42

版权声明

本书版权保护已经过期，属于公版书！并由"文硕阁"网站的用户制作并发布于文硕阁 网站内,请大家在“合理使用”范围内使用

这本电子书可供中华人民共和国（the People's Republic of China）和世界上大多数其他地区的任何人免费使用，几乎没有任何限制。您可以根据本文件中包含的"传硕公版书许可条款"中的授权许可进行复制、赠送或改编它。

如果您不在中华人民共和国，您必须在使用本电子书之前查看您所在国家/地区的法律。

什么是公版书？

根据我国现行「著作权法」第 20、21 条的规定，除署名权、修改权、保护作品完整权外，中国公民对其著作的法定权利均于作者死亡后第五十年的 12 月 31 日截止。超过著作权法保护日期后，其作品就进入了公有领域（公共版权）

这种因作者死亡超过 50 年而丧失发行权、改编权等著作权利的书籍，就称为“公共版权书籍”，简称“公版书”。

传硕公版书保护计划

中华文明5000多年绵延不断、经久不衰，在长期演进过程中，形成了中国人看待世界、看待社会、看待人生的独特价值体系、文化内涵和精神品质，这是我们区别于其他国家和民族的根本特征，也铸就了中华民族博采众长的文化自信。

文化是一个国家、一个民族的灵魂。文化兴国运兴，文化强民族强。

所以我们发起了公版书保护计划。来帮助把中国五千年的文明硕果进行电子化并服务于大众，我们网站所有内容都是免费、自由、无版权的。对所有的读者免费！

使用 **文硕阁** 中的公版书 不需要获得许可（在中国，这属于“合理使用”）。这适用于所有用途，包括商业用途。换句话说，即使是商业盈利用途，也无需支付版税。

我们希望能有更多的用户加入到文硕阁网站中来，让我们一起来保护传承文明的硕果。

源浚者流长，根深者叶茂。文化自信是一个国家、一个民族发展中最基本、最深沉、最持久的力量。

如何联系我们？

网站：www.wenshuoge.com

邮箱：7sbook@duck.com



(扫码访问网站)



(扫码加客服微信)

提要

【臣】等谨案宗玄集三卷附錄元纲论一卷内丹九章经一卷唐吴筠撰筠字贞节华陰人隱于南阳天寶中召至京师请为道士居嵩山复求还茅山东遊会稽往来天台剡中与李白孔巢父酬唱大歷中卒弟子私謚曰宗 先生新旧唐书皆载隱逸传此本为浙江鲍氏知不足斋所钞末有原跋云收入道藏中世无别本然文献通考云吴筠宗 先生集十卷前有权德輿序列于别集诸人之次则当时非无传本此跋题戊申歲不着年号疑作于通考后也卷首权德輿序称太原王顏类遗文为三十卷后又有吴尊师□亦德輿撰乃言文集二十卷均与文献通考称十卷者不合考德輿序称四百五十篇而此本合诗赋论仅一百十九篇则非完书矣又旧书筠本传云鲁中儒士也新书本传云华州华陰人德輿序称华陰人而传又云鲁儒士序称受正一法于冯尊师上距陶宏景五传传又云受正一法于潘体元乃冯之师亦相乖刺考旧书李白传称天寶初客遊会稽与道士吴筠隱于剡中而传乃言禄山将乱求还茅山既而中原大乱江淮多盜乃东遊会稽与诗人李白孔巢父诗篇酬和不知天寶乱后白已因永王璘事流夜郎矣安能与筠同隱此传殆出于依托序又称筠卒于大歷十三年卒后二十五歲乃序此集其年为贞元十九年德輿于贞元十七年知礼部贡举明年真拜侍郎故是年作序系衔云礼部侍郎其文与史合而金丹九章经后又载筠自序一篇题元和戊戌年作戊戌乃元和十三年距所谓先生化去之年又隔四十年后且云元和中遊淮西遇王师讨蔡贼吴元济避乱东岳遇李谪仙授以内丹九章经殆似呓语然则此序与传同一伪撰矣据新旧唐书皆有元纲三篇语则卷末所附元纲论三篇自属筠作至内丹九章经核之以序伪妄显然以流传已久姑并錄之而辨其抵牾如右乾隆四十六年四月恭校上

总纂官【臣】纪昀【臣】陆锡熊【臣】孙士毅

总校官【臣】陆费墀

宗玄集原序

道之为物无不由也无不贯也而况本于 览发为至言言而蕴道犹三辰之丽天百卉之丽地平夷章大恬澹温粹飘飘然轶八紘而泝三古与造物者为徒其不至者遗言则华涉理则泥虽辩丽可嘉采真之士不与也宗 先生吴君其知言者欤先生讳筠字贞节华陰人也年十五笃志于道与同术者隱于南阳倚帝山閔览古先遐蹈物表芝耕云卧声利不入天宝初 纁鹤板征至京师用希夷启沃膺合 圣请度为道士宅居于嵩阳丘乃就冯尊师齐整受正一之法初梁贞白陶君以此道授升 王君王君授体 潘君潘君授冯君自陶君至于先生凡五代矣皆以陰功救物为王者师十三年召入大同殿寻又诏居翰林明皇在宥天下顺风祈向乃献 纲三篇优诏嘉纳志在遐举累章乞还以禽鱼自况藪泽为乐得请未几盗污三川羽衣虚舟泛然东下栖匡庐登防稽浮浙江息天柱隱机埋照顺吾灵 有时放言以畅天理且以园公歌咏于紫芝 景怡悅于白云故属词之中尤工比兴观其自古王化诗与大雅吟步虚词游仙杂感之作或遐想古理以哀世道或磅礴万象用防环枢稽性命之纪达人事之变大率以嗇神挫锐为本至于奇采逸响琅琅然若戛云璈而凌倒景昆阔松乔森然在目近古游方外而言六义者先生实主盟焉至若总论谷神之妙则有 纲哀蓬心蒿目之遠于道也则有神仙可学论疏瀹澡雪使无落吾事则有洗心赋岩居赋脩胸中之诚而休乎天君则有心目论契形神颂其他操章寓书贊美叙别非道不言言而可行泊然以微妙卓尔而昭旷合为四百五十篇博大真人之言尽在是矣大厯十三歲歲直鶡首止于宣城道观焚香返真于虚室之中门弟子有邵冀 者率吁其徒宁神于天柱西麓从其命也冀 徧得先生之道如槁木止水剗心遗形太原王顔尝悅先生之风自先生化去二十五歲顔为御史丞类斯遗文为三十篇拜章上献藏在秘府厥后冀 得其本以授予请序引其迳庭庶传永久别有辩析世惑之论不列于此编至若挺神奇祛物怪告链脱之地合肸鬻之符皆备刻于金石者之说今徒采获斯文以序崖略且俾后学知道者必知言云权德輿序

宗玄集卷上

岩栖赋

感玄圣之垂训悟已亲而名疎言可放而从默身应卷而勿舒爱鷦鷯之巢林在一枝而有余性所悦而难违托兹山以结庐果栖迟而我愜即逍遥之灵墟观其寮崇峦横峻谷激泌泉罗森木后巍嶷以萦纡前参差而耸伏追陰壑之夏凉偃阳崖之冬燠美劲节于松筠翫幽芳于兰菊虚籁清耳闲云莹目因海鹤以警夜任晨鸡以知旭虑静于无扰神恬于寡欲于是歌考槃于诗人讽嘉遯于大易遠浮俗之艰险消毀誉之损益蹈方外之坦途信可免于兢惕既即陰以息影由不行而灭迹虽区中之末计实世表之长防人所弃而已收故处约而恒适览无见以收视聽无声以返默和匪专于防酒乐奚必于丝桐焚清香以链气启玉检而击防期遣滯于昭旷庶延真于感通筌太虚之有象覈妙用之非空朝天甚简采药多暇形犹资于吐纳意已屏于将迓知道无废兴而物有存谢故挹生本而常生体化宗而不化萧萧絕尘谁与为隣迹遠而朋从益旷机忘而鸟兽可驯韵靡叶于当时心常依于古人仰巢由浩浩之逸轨咏羲农默默之化淳师黄老之 奥友乔松之道真慙无功之逮物良独善于吾身只所幸其自得敢韬精于隱沦

竹赋

惟坤灵之播育何备物之实繁伟兹竹之标挺得造化之清源契道合虚表贞示节叶森散以翠错茎鲜脩而琼洁尔其和风流畅万彙昭陈杨葩晬其密苑萑柳藹于通津不郁馥以启曜但葳蕤而有筠亦未之为异也至如杀气凌厉凝霜萧瑟览平楚之苍茫窥众林之如失冒冰霜之涸沍逾青茝以郁密若是则殊可重焉故诗曰如苞书称厥贡猗兹淇园美彼云梦昔在轩后肇官陰阳俾伶伦于嶰谷伐脩竹之珍篁裁六律以协气调八风而顺常然后成竽簫以备乐其声滥而弥长笙镛以间鸟兽踟踟谅自然之纯粹曷羣材之可方若乃渭川千畝山阳数林会稽方润于碧玉罗浮比色于黄金上黝黝以云翳下泠泠而风吟祛赫曦之燠景纳凄清之凉陰王子所以啸咏嵇生为之幽寻召嘉宾及令友畅醪醴与鸣琴美游盘之逸趣清寂寞之遠心若乃夹沧江倚丹嶸蓄水雾之沈沈摇岩烟之漠漠湘妃有挥涕之感楚谣兴防露之作或挺鼓吹之嵌崆或垂天门之磅礴皆鸾凤之所翔集孔翠之所栖托岂独婣娟于广漠之壤亦有璀璨于蓬萊之峯结实珠粒敷花紫茸拂皓粉以飞雪摧紺茎以韵钟固列仙之攸翫匪吾人之所从也亦有化雉吴国成龙葛陂容人笕筍育虫桃枝一笋明其 嗣三节获乎婴儿紫灯纂以感孝茂窓櫺以表奇簪冢坛以尘灭环石牀以防滋皆灵变之譎怪良难得而备知尔其众彙非一则有策篲防筵 筒箨簌 菰槌之肃矗龙钟云母之扶疎箬箭浮色以缥焕菡 綵文而绣摠方志之所遗载山经之所阙书者安可得而详矣靡不劲坚其性葱蒨厥色不规而圆不揉而直故高皇制冠以宝位孝文剖符以表职博望侯传于大夏之外穆天子封于 池之侧推此类以弥广匪斯文之可极

逸人赋

粵真隱先生者体旷容寂神清气冲迴出尘表深观化宗偃太和之室咏 古之风收人之所不宝弃人之所必崇以道德为林囿永逍遥乎其中有翫世公子思发其防乃诣先生之所舍询出处之异同于是稽首跪而称曰仆闻士之生也备百行荣九德静为物轨动为人则可见故不隱可言故无默使上叶唐虞之化下安仁壽之域既两仪交泰九有不携然后分人之土执人之珪故伊尹负鼎而去有莘太公释钓而出磻磻朝沦洿泥夕步丹梯若乔木之集鸛凤清流之跃鳬鹭何必矫抗斯慕中和见睽蹊迹巢许追踪夷齐膏屯于骨肉和勦于眈黎损坦荡之脩衢履幽废之荒蹊漱寒泉之泠泠借青草之萋萋悲林风之夕振厌山鸟之晨啼始支离而馁息终齟卷而寒栖信行藏之足驗唯名实之可稽愿一闻其至言俾向方而不迷也先生字合寥天心凝帝先泯祸福之境杜枢机之权将有言而中止不得已而应焉曰夫洪荒之际物靡艰阻上如崇丘下若平楚高卑定位各畅其所贤愚同条智诈罔举孰为出孰为处孰为默孰为语迨乎时迁朴散质变淳讹升沈异躅明暗殊科刚柔相轧曲直相摩或贪餌以吞钩或横飞以触罗惟皇王之愍俗爰拯溺于洪波乃自揖让迄于干戈虽政教之异宜诚法令之滋多欲遏乱以求理譬招风而静柯遂饰礼以邀敬修乐以导和虽圣哲之区区卒倾頽而奈何于是上有淫君下彰忠臣龙逢之列菟 之伦苟徇义以成名竟违天而杀身祇足以增恶声于暗主竭惠泽于生民故全德之士韬精保真悟厯数之在运知存亡之匪人将扶危而翼颠犹一发之擢千钧块壤之壅长津所以守嘉遁之元吉从少防之隱沦于是洪崖广成肇其端子州善卷绪其后汾水见傲帝之宾颍阳闻洗耳之叟以鸿名为糟粕以大宝为尘垢情蠲于取舍意适于林藪不剝心而无欲非吐纳以永壽眄江河为畎浍谓嵩岱为培塿故天子不可得而臣诸侯安可得而友岂作者之唯艰诚歷世而可久莫不道贯通于古今迹无系于奇偶镇末代之伪薄使向风而归厚若乃子高之规夏禹臧叟之诲周文仲连之却秦师干木之蕃魏君 高俛仰以成绩四皓从容以立勲初混世以表用竟超然而絕羣既抗志于青霞聿栖身于白云兹乃无封滯于万物时抚俗以解纷者矣若乃顾推让有泰山之重视富贵若鸿毛之轻则孤竹之子王季之兄甘食薇于首阳之下悅采药于句吳之垌柱史归居而道阐关尹去职而真成晨门藏名于抱关沮溺避世而耦耕汉陰抱瓮以忘机渔父乘流而濯纓于陵灌园以逃相莱氏负戴以辞卿南华漆园以寓迹列子郑圃以消声楚狂隱晦蜀严湛冥丞相推堂于盖公廷尉结轡于王生故文景尊黄老之术国既富而刑清季主卜筮以训俗文通讼田以秽名顏阖凿坯以避聘伯休潛遁以脱荣庞公课妻以耘鋤严光拂衣于帝庭启期三乐以达意梁鸿五噫以抒情尚子平之持操毕婚娶以长往许叔 之守节遗伉儷以遐征聽苏门之永啸若鸾凤之和鸣见夏统之长歌歛云飞而雪零至于焦先瞿硎郭文董京天机符于太素渊默会于真精寂尔无闷则子真仲蔚确乎不拔有台佟管宁或琴书以自娱或澹漠以无营此则同人者体貌异人者神明抱不易之纯粹含自然之孤贞道取怡于闲放业故失于屯平晓物理之尚简知天道之恶盈彼鸿飞于寥廓奚弋者之能縈故宠章焉得而见累悔吝何由而相傾哉尔其陰德密庸 功潜着不感其所毁不欣其所誉为无为以成性事无事以澹虑洞希夷之可察涉恍惚而斯据托松涓以结友忽驾景而飞去兹乃隱道其谁能测无何乡之处乎是以朝廷之士一入而不出山林之客宜往而勿还若沽名于白贲 迹于青山覬蒲轮于谷口希束帛于云關非岩泉之养正实丘壑之藏奸繫末世之鄙薄曷清流之可攀或因兹以幸达詎不蕴终身之厚顏矣夫徼福之萌祸胎祈昌之结衰根故不韦之识奇货献孕妻以密言吕公之辯龙顏谋纳女以永尊计克从而事捷排天路以騰翻遽变生而殃構招衅罚以钟门霍氏之翼三后谓伊周之复存何赫奕于当时亟殄殲其子孙鉴兴亡之体势实

异代而同源已覆败于前车又倾摧于后轍秦肆坑儒之毒汉流党錮之冤众君子欲修名显著乃貽戚于莹魂仰天居之悠迴谁克叶于帝閤固知祥风依于蓬荜沴气袭于华轩吾方将友汗漫师 元默生死同乾坤当愈幽忧之疾所以秉斯道而弥敦也先生之言既毕公子拜手而谢曰小子久耽浅近之常议幸沐精防之舆论可谓涤除遗滓披拂重昏愿澡雪其形神以游夫子之末藩而已矣

宗玄集卷中

唐 吴筠 撰

思还淳赋

伊太素之 风迨羲轩而浸隐虽朴散以成器暨唐虞而未泯淳化日以沦亡及殷周而殆尽唯挺生之尼父覩浇漓而致悯乃修诗书制礼乐以救崩隤将驱末驾以旋轸 元适彼流沙遗道德于关尹信文约而义躋俾浮竞以返本固大运之推迁虽圣人亦不能扶其颠隤五霸既没七雄交驰爰至暴秦儒残道隳皇汉底定人懷辑熙孝文御宇所向无为刑法防措欢心秉彝孝武好夫征伐亦兼崇于典仪虽纯懿未举而文章载施元成懦弱政教陵迟彼苍生息肩之日在世祖中兴之时何孝明之匪德为祲梦之所 创戎神之祠宇遵恍惚之妄见始涓防于滥觞终浩瀚以流美歷三国而犹防更五胡而大建华夏之礼废遑荒之风扇沴气悖以兴行人心颯以倾变遂侮君亲蔑彝宪髡跣贵簪裾贱事竭思以徼福劣含疑而惧譴上发迹于侯王下无劳于獎劝尊黷属之金狄列峥嵘之紫殿伐千畝之竹不足纪荒唐寓言倾九府之财焉能充惓款诚愿于是宝树琼轩凌云照日铿鍠窈窕不可谈悉越章华之宏壮罗区宇而比栢栋宇已来未有侔匹重贝叶讹谬轻先王典籍钦刑残鄙夫宴广厦精室使白屋终劳緇门永逸自国至家祈虚防实防而是者则给之以嘉祥沮而非者则欺之以罪疚故中智已下助成其奸宄之术可谓至真隱大伪出所以防党妖徒此焉游息储不因耕衣不俟织诱施冒货鲸吞蚕食若蛟螭之在水犹豺豹之附翼罔不假小善以外慈藏深邪而内贼岂止一时之封豕乃为万代之蠹蟹足使宵人得意而傲睨上士伤心而悯默于戏天道乎人事欤天道遠而难晓人事近而可详虽孽自天启亦妖由人彰斯乃钟刘石之两羯偶苻姚之二羌凭书之恢譎资汉笔以阐扬道安讨论于河洛惠遠润色于江湘圖澄挟术以鼓舞罗什聚徒以张皇迹无徵于班马理唯窃于老莊褒蚩蚩为中土貶诸夏为偏方务乎在噬儒吞道抑帝掩王夺真宰之柄操元化之纲自古初以逮今未有若斯之 逆天暴物干纪乱常爰自晋宋迄于齐梁靡不兴之者灭废之者昌竟流遁而不返终取悔以危亡者其故何哉盖蓼虫忘辛习其久翫将助其理反增其乱若运穷数极则君悟臣断亿兆不谋而密移神祇应感而冥賛山川为之澄穆日月为之炳焕自然朝思文明野冀贞观譬曾冰之坚积非阳春不能使之剖泮当是时也太上有命爰徵万灵勅司奸以紉慝遣执法以详刑五帝合符三官同征乃命天将总天丁伐天鼓扬天旌挥金镶擲火铃使列缺激迅霆出昭旷入杳冥捕无影搜无声获祲师殲氛兵正太阶扫欃枪荡遗祲于千载流惠泽于八紘班师下土归功上清然后人伦可以顺化神道可以永真变讹僻之俗为雍睦之毗伫淳风之剋复吾乃鼓腹击壤于岩垆吟咏柏皇与骊连大庭而已矣

洗心赋

尝甄道以谋已考往哲之所经资忠孝与仁义保存歿之令名伊周功格于皇天孔墨道济于生灵始崇崇于可久终寂寂而何成唯闻松乔之高流超乎世表以永真意稟受之使然固脩链之所得奚稽疑以究理庶髣髴乎遗则斯乃御太易之祖先体虚和之宗极出变化之机范

离陰阳之动息知成我者神贼我者人神符性以契道人应情以防真彼昭然而独见乃萧邈以殊伦故能积精防而显著乘一气以日新昔予感夫前修良反俗于壮齿捐区中之末驾骋方外之逸轨收当世之所遗贱时人之所伟俯沧海以渊淡仰赤霄以耸峙人耽厚味与美饰吾不知其所美也于是遠尘境栖云岑洁其形清其心方冀觀杳冥之状闻虚寂之音真人居高以流惠正气无遠而见寻鉴双景之皎皎翼万灵之森森莹丹宫之神光漱玉池之灵液修五纬以飞奔蹈七元而纵歷阳晶煜以景萃陰滓渙而冰释体因用而弥和心有存而转寂味

防以永日讽灵篇以自怡虽天路之辽復底通感而可期何逆丑之干纪集兵戈于洛师畏巢焚以鸟逝聿投迹于江湄忧虞匪遑于专静吾道于是乎中亏使清虚恬淡乖其致为垢浊喧嚣之所欺遂荏苒以忘返将十年而迨兹惜流光之不驻鉴华发以兴悲噫嗟进有驰车升丘之难退有转规入谷之易萦尘务以汨没皆近习之所致徇人情之所取必神道之我弃理无往而不复思挺然以释累洿可以洗浊可以澄俾疎惰之情废则精勤之思兴代甘芳以淳淡易浮荡以虚凝合抱生于毫末履霜至于坚冰孰谓希夷之无物吾必知恍惚之可凭也乃复拂衣长林从其夙尚近宗仙经遠稟真匠机已忘而气正战复胜而神王庶斯道之可恒喜勿药于无妄夫造物者结虚而为实致道者反羸而至精所以齐天地之悠遠叶日月之昭明哀众人沦胥以徂谢吾方独务于长生

登真赋

悟世促而道永知名疎而体亲遂忘机而灭迹方鍊骨而清神道不予欺兮感通象罔天必我鉴兮保合元真陰滓落而形超阳灵全而羽化惟九仙之奕奕降八景而来迺何霓旌之悠扬吾其整此霄驾持造化之系出存亡之表遠四野之冥冥近三辰之皎皎涉虚寥之浩旷觉宇宙之卑湫龙鸾竦兮升我于 都流玉音于至寂散金光于太无星官后从云将前驱使八威与六领荡遗祆于天衢麾百魔以震伏总万灵以游娛翠旄纷纷兮拂重霄而凌厉入闾阖之九關过太微而一憩倚华盖而招真登紫庭而謁帝饮予以沆瀣乐予以 钧左盼夫郁仪右瞻乎结璘信巍巍以荡荡肃肃而振振享防斯彻邀嬉未已泛鹑河之广流折騫木之芳蘂灵香霑而八冲宝云沓而四起谅兹境之足悅乃此情之匪留扬玉轮以迳进更冉冉而上浮控三气而高举何万夫之足越觀元始于玉晨謁虚皇于金阙真朋森而无算咸顾予以致悅于是凝而为有散而为宗见不以察闻不以聪视极于无际听周于无穷动不因心飞不假翼与浩劫而灵长视万春为一息或跻綺合之榭或宴圓华之房蹑太漠之清迴弄明霞之焜煌仰瑶岭之嵯峨俯碧津之汤汤罗绛树之杳蔼激神风之玲琅何至乐之靡极永逍遙以为常

庐山云液泉赋

筠所居之东岭其半侧有泉洪纖如指冬夏若一山少凡石土多云母其水色白味甘且清此则云母滋液所致因名云液之泉乃结宇其傍引于轩牖之下既饮既漱永翫不斲今兹夏季不雨至于十月江湖耗井涧涸此泉泠泠不减平昔懿其若是爰以作赋

坤元孕气潜畅成泉冠五行之首为万物之先爰有漬流出此山侧处防險而难知犹井渫之不食我搜灵泌载披载登见其地僻至洁源深有恒沍寒不为之增乃考室以饮而乐在枕肱

存俸 玉之膏得乃云华之液疾可蠲生可益引充狎翫唯意所适悬之则皎素壅之则澄碧昼浮光以悠扬夜含响而淅沥陰阳为灾水旱失节不雨炎夏暨乎 月汪汪洪波久已竭耿耿瀑布今亦絕挫江湖之浩荡况涧谷之微劣斯泉秉彝毫纖无亏虽遠不霑惠而近有所滋彼瀟霏于畴日岂不慙防防于此时夫醴泉无源而易涸丹溜乍见而难挹曷若平以为鉴酌焉取给何以神山之漢帝台之浆涌异域之表湛无人之乡兹亦标奇于絕境真可谓灵而长也

猿赋【并序】

前者称周穆王南征君子变为猿鹤小人变为虫鱼夫神用无方未必不尔筠自入庐岳则觀斯 猿嘉其雨昏则无声景霁则长啸不践土石超遥于万木之间春咀其英秋食其实不犯稼穡深栖遠处犹有君子之性异乎狙獠之伦且多难已来底品凋败麋鹿殫于网罟遗眈困于诛求此独萧然物莫能患岂不以托迹冥絕不才遠祸昔夫子叹山梁雌雉曰时哉时哉予固感之聊以作赋云耳

伊 猿之所育于南国之层岑动不践地居常在林每泛泛而无防亦熙熙而有心霁嵐昏而共默风雨霁而争吟使幽人之思清暢羈客之涕霑襟何必聆嶰谷之管对雍门之琴哉歷千寻之乔木俯万仞之危峤弄游云之乱飞嬉落日之横照连肱润饮命侶烟噍或聚而闲栖或分而迴趨壽同灵鹤性合君子阻重岩之险非虎豹所履防交柯之密岂雕鹗能视故逢防操弓憚高深而止邓公折箭含惻隱而已何患累之罕臻不干物以利已詎若 凌人以就戮猩猩甘酒而遘死夫时珍貂裘世宝狐白彼徒工于隱伏终见陷于机辟麝怀香以贾害狙伐巧而招射小则翡翠殒于羽毛大则犀象残于齿革孰能去有用之损取无用之益因弃置于常情永逍遙以自适无威刑相临以族类相亲食资诸物衣取诸身不赋不役靡劳靡勤如正教之未施保巢居以淳淳匪虞氏之所及何狙公之能驯吾固知人为万物之贵又焉测元化之所大均乎

神仙可学论

洪范向用五福其一曰壽延命至于期頤皇天犹以为景福之最况神仙度世永无穷乎然则长生大庆无等伦以俦拟当代之人忽而不尚何哉尝试论之中智以下逮于庶民与飞走肖翹同其自生自死昧识所不及闻道则相与笑之中智已上为名教所检区区于三纲五常不暇闻道而若存若亡能挺然竦身而不使常情汨没专以修链为务者千万人中或一人而已又行之者密得之者隱故举俗罕为其方悲夫昔桑矫问于防子曰自古有死复云有仙如何防子曰两有耳夫言两有者为理无不存理无不存则神仙可学也嵇公言神仙特受异气稟之自然非积学所能致此未必尽其端矣有不因修学而致者稟受异气也有必待学而后成者功业充也有学而不得者初勤中墮誠不终也三者各有其防不可以一贯推之人生天地之中殊于众类明矣感则应激则通所以耿恭援力平陆泉涌李广发矢伏石饮羽精誠在于斯须击犹土石应若影响况丹悬久着真君岂不为之潜运乎潜运则不死之阶立致矣孰为真君则太上也为神明宗极独在于宵冥之先高居紫防之上陰鹭兆庶诗称上帝临汝书

曰天监孔明福善祸淫不差毫末而迷悞之子焉测其源日用不知背本向末故远于仙道有七焉近于仙道亦有七焉当世之士未能窥妙门洞幽蹟雷同以泯灭为真实生成为假幻但所取者性所遗者形甘之死地乃为常理殊不知乾坤为易之蕴乾坤毁则无以见易夫形气者为性之府形气败则性无所存性无所存于我何有远于仙道一也

其次谓仙必有限竟归沦坠之 彼昏于智察则信诬罔詎知块然之有起自寥然之无积虚而生神神用而孕气气凝而渐着累着而成形形立神居乃为人矣故任其流遁则死反其宗源则仙所以招真以链形形清则合于气合道以链气气清则合于神体与道防谓之得道道固无极仙岂有穷乎举世大迷终于不悟远于仙道二也

其次强以存亡为一体谬以前识为悟真形体以败散为期营魄以更生为用乃厌见有之质谋将来之身安知入造化之洪鑪任陰阳之鼓铸游魂迁革别守他器神归异族识昧先形犹鸟化为鱼鱼化为鸟各从所适两不相通形变尚莫之知何况死而再造诚可哀者而人不哀远于仙道三也

其次以轩冕为得意功名为不朽悅色耽声丰衣厚味自谓封殖为长策贻后昆为遠图焉知盛必衰高必危得必防盈必亏守此用为深固置清虚于度外肯以恬智交养中和率性通真为意乎远于仙道四也

其次强盛之时为情爱所役班白之后有希生之心虽修学始萌而伤残未补靡蠲积习之性空务皮肤之好窃慕道之名乖契真之实不除死籍未载 策歲月荏苒大期奄至及将殂谢而怨咎神明远于仙道五也其次闻大丹可以羽化服食可以延龄遂汲汲于鑪火孜孜于草木财屡空于八石药难效于三关不知金液待诀于灵人芝英必滋于道气莫究其本务之于末竟无所就谓古人欺我远于仙道六也

其次身栖道流心溺尘境动违科禁静无修习外招清静之誉内蓄奸回之谋人乃可欺神不可調远于仙道七也

若乃性耽 虚情寡嗜好不知荣华之可贵非强力以自高不见淫僻之可欲非闲邪以自慎体至仁舍至静超迹尘滓栖真物表想道结襟以无为为事近于仙道一也

其次希高敦古刻意尚行知荣华为浮寄忽之而不顾知声色能伐性捐之而不取剪陰贼树陰德惩忿窒欲齐毁誉处林岭修真近于仙道二也

其次身居禄位之场心游道德之乡奉上以忠临下以义于己薄于人厚仁慈恭和 施博爱外混嚣浊内含澄清潜行密修好生恶死近于仙道三也

其次潇洒华门乐贫甘贱抱经济之器泛若无洞古今之学旷若虚爵之不从禄之不受确乎以方外为尚恬乎以摄生为务近于仙道四也

其次稟明穎之姿懷秀拔之節奮志機之旅當銳巧之師所攻無敵一戰而勝然後靜以安身和以保神精以致真近于仙道五也

其次追悔既往洗心自新雖失之于壯齒冀收之于晚節以功補過過落而功全以正易邪邪防而正在轆轤不能移其操誼晬不能亂其性惟精惟防稍以誠着近于仙道六也

其次至忠至孝至貞至廉按真誥之言不待修學而自得比干剖心而不死惠風溺水而復生伯夷叔齊曾參孝已人見其沒道之使存如此之流咸入仙格謂之隱景潛化死而不亡此例自然近于仙道七也放彼七遠取此七近謂之拔陷區出溺塗碎禍車登福輿始可與涉神仙之津矣于是識元命之所在知正氣之所由虛凝澹泊怡其性吐故納新和其神高虛保定之良藥匡輔之使表里兼濟形神俱超雖未升騰吾必謂之揮翼于丹霄之上矣夫道無為無形有情有信故曰人能思道道亦思人道不負人人負于道淵哉言乎世情謂道體 虛則貴無而賤有人資器質則取有而遺無庸知有自無而生無因有而明有無混同然後為至故空寂

寥大道無象之象也兩儀三辰大道有象之象也若但以虛極為妙不應以吐納元氣流陰陽生天地運日月也故有以無為用無以有為資是以覆載長存真聖不滅故為生者天地之大德也所以見宇宙之廣萬物之殷為吾存也若烟散灰滅何異于天傾地淪彼徒昭昭非我所有故曰死者天人之荼毒孰能黜彼荼毒拂衣絕塵獨與道隣道豈遠乎將斯至矣夫至虛韞妙待感而靈猶金石含响待擊而鳴故豁方寸以契虛虛則靜凭至靜以積感感則通通則宇宙泰定天光發明形性相資未始有極且人之稟形模范天地五藏六府百關四肢皆神明所居各有主守存之則有廢之則無有則生無則死故去其死取其生若乃諷太帝之金書研洞真之玉章集帝一于絳宮列三元于紫房吸二曜之華景登七元之靈綱道備功全則不必琅玕大還而高舉矣此皆自凡而為仙自仙而為真真與道合謂之神人神人能存能亡能晦能光出化機之表入太漠之鄉无心而 鑒無翼而翱翔嬉明霞之館宴羽景之堂歡齊浩劫而無疆壽同太虛而不可量此道布在金簡安可輕宣其密奧哉好學之士宜啟玉檢以探其秘焉又儒墨所宗忠孝慈愛仙家所尚則慶及王侯福祚祖考祚流子孫其三者孰為大于戲古初不得而詳羲軒已來廣成赤松令威安期之徒何代不有遠則載于竹帛近則接于見聞古今得者皎皎如彼神仙可學炳炳如此凡百君子胡不勉之哉

心目論

人之所生者神所托者形方寸之中實曰靈府靜則神生而形和躁則神勞而形斃深根寧極可以修其性情哉然動神者心亂心者目失真離本莫甚于茲故假心目而發論庶防于遺滯清神而已且曰心希無為而目亂之乃讓目曰予欲忘情而隱逸率性而希夷偃乎太和之宇行乎四達之達出乎生死之域入乎神明之極乘混沌以遐逝與汗漫而無際何為吾方止若且視吾方清若且營覽萬象以汨予之正悅美色以淪□之精底我邈邈于無見熙熙于流眄搖蕩于春台悲涼于秋甸凝燕壤以情竦望吳門而發變瞻楚國以永懷俯齊郊而泣戀繫庶念之為感皆寸眸之所 雖身耽美飾口欲厚味耳歡好音鼻悅芳氣動予之甚皆爾之謂故為我之尤職爾之由非爾之愆而誰之仇乎目乃忿然而應之曰子不聞一人御域九有承式理由上正亂非下忒故堯俗可封桀眾可殛彼殊方而異類猶咸順乎帝則統形之主心為靈

府逆则□舍顺则予取嘉祥以之招悔吝以之聚故君人者制理于未乱存道者克念于未散安有四海分崩而后伐叛五情播越而能贞观者乎曷不息尔之机全尔之微而乃辩之以物我照之以是非欣其荣感其辱畅于有余悲于不足风举云逝星奔电儵纷纶鼓舞以激所欲既汨其真而混其神乖天心而悖天均焉得不溺于造物之景迷于自然之津哉故俾予于役应尔之适既婴斯垢反以我为咎嗟乎嗟乎何 之有心乃愀然久焉复谓目曰顾予与尔谁明其防何隐见之隔而 同若此既底物之为患今将择其所履相与超尘烦之疆陟清寂之乡餐颢气吸晨光咀瑶华漱琼浆斯将期灵化于羽翼出云霞而翱翔上升三清下绝八荒托乔松以结友偕天地以为常何毁誉之能及何取舍之足忘谅予图之若兹其告尔以否臧目曰近之矣犹未为至若然者所谓欲静而躁随辞埃而滓袭闇乎反本之用方邈然而独立夫希夷之体也卷之无内舒之无外寥廓无涯杳防无对独捐兹而取彼故得小而遗大忘息陰以灭影亦何逃于利害伊虚室之生白方道德之所载绝人谋于未兆乃天理之自会故 元挫锐以观妙文宣废心而用形轩帝得之于罔象广成契之于杳冥顔回坐忘以大通庄生相天而能精歷众圣以稽德非智谋之是营盖水息澜而暎彻尘不止而鉴明未违世以高举亦方寸之所宁故能泊然而常处感通而斯出不光而曜不秘而密宜始终而谁异与万物其为一因而靡得是以罔失诚踵武于坦涂可常保于元吉若弃中而务表乃防往而不窒其故何哉水清而龙蟠林丰而兽居神栖于空洞道集于 虚苟不刳其所有焉得契其所无非夫忘形静寂瑕滓镜涤 关自朗幽键已辟曷可度于无累焉不然安得驾八景升九霄覩金阙之煌煌步紫庭之寥寥同浩劫之罔极以万春为一朝乎心于是释然于众虑凝澹于犹豫澄之而徐清用之而不遽致谢于目曰达我以善道 我以至言觉我以大梦启我以重 升我以真阶纳我以妙门纵我于广漠之野游我于无穷之源既匪羣而匪独亦奚静而奚諠協至乐之恒适抱真精而永存遣之而无遣深之而又深通乎造化之祖达乎乾坤之心使我空欲视于目盲之外塞将见于 黄之林覩有而如见空寂闻韶而若聴谷音与自然而作侣将无欲以为明免驱驰于帝主保后天之所能窒欲于未兆解纷于未扰忘天壤之为大忽秋毫之为小处寂寞而闻和潜混溟而见晓应物于循环含光而闭闕飘风震海迅雷破山滔天焚泽而我自闲彼行止与语默曾何庸思于其间哉

形神可固论【并序】

余常思大道之要 妙之机莫不归于虚无者矣虚无者莫不归于自然矣自然者则不知然而然矣是以自然生虚无虚无生大道大道生氤氲氤氲生天地天地生万物万物剖氤氲一炁而生矣故天得一自然清地得一自然宁长而久也人得一炁何不与天地齐壽而致防亡何也为嗜欲之机所速也故 和经云人绝十二多少抱宗元一可得长生又玉京山经云常念餐元精链液固形质胎息静百关寥寥究三便泥丸洞明景遂成金华仙此可与天地齐壽日月齐明矣其门大开无人解入岂不哀哉余虽不才辄敢为论见此碌碌之徒区区之辈在道门者不知有守道服炁养形守神金丹之术或国之重臣匡佐社稷在于儒典禄位弥高不知有摄养之术易形之道反精之规却补之妙多见使形体枯槁不终其壽实可伤哉余今辄论先贤之故事列以五章才不足比之为文词不足谄之为议略述大体是非之道令守道者取虚无自然正真之一服炁者知两半之前胎息之妙绵绵若存尔淘去三尸日满上升 中之至合丹药者链铅取金化石为水黄芽河车神室殼矣制伏水银而为金丹刀圭入口天地

齐年悟则明矣迷为词繁唯后学者审而消息万不失一庶品同修感而不应得之者闭兑寻之者静思何虑节符不契大道萌生者哉

守道

夫道者无为之理体 妙之本宗自然之母虚无之祖高乎盖天深乎包地与天地为元与万物为本将欲比并无物能等意欲测量无处而思于混成之中为先不见其前毫厘之内为末不见其后一人存之不闻有余天地存之不闻不足旷旷荡荡渺渺潏潏人能守之天地如掌故岐伯曰上古之人知道者法则阴阳和于术数饮食有节起居有度为而不为事而无事即可柔制刚阴制阳浊制清弱制强如不退骨髓方守大道大道者多损而少益多失而少得益之得之至真之士也益者益形得者窃防得此窃防感通神明说苑曰山之高云雨起水之深鱼鼈归人守道福自至

服炁

夫元炁之术上古已来文墨不载须得志人歃血立盟方传口诀只如上清禁诀玉函隐书百家诸子诰传词文乃至老君秘防内外黄庭灼然不显不露五千真文略述只言 牝门谓天地根似显枝叶本蒂深密每寻诸家炁术及见服炁之人不逾十年五年身已亡矣余生好道术志在元和每见道流皆问无事千说万别互有多般或食从子至午或饮五牙之津或吐故纳新仰眠伸足或餐日月或闭所通又加绝粒以此寻之死而最疾何者为攻内受外故速死也抱朴子曰两半同升合成壹大如弹丸黄如橘就中佳味甜如蜜尔牢持之谨勿失子若得之万事毕是以炁之为功如人之量器如水之运流堤壤则水下流矣闭通则炁不居矣但莫止出入自然之息胎链精神固其大和含其大道若明胎息则晓元炁胎息与元炁同也德经曰可以却走马以粪如婴儿之未孩故 甲经云我命在我不在天不在天者谓知元炁也人与天地各分一炁天地长存人多夭逝何也谓役炁也炁者神也人者神之车也神之室也神之主也主人安静神则居之躁动神则去之神去则身死者矣

养形

夫人未有其兆则天地清宁剖道之一炁承父母余孕因虚而生立有身也有一附之有神居之有炁存之此三者递相成可齐天地之寿共日月而齐明何者为修身慎行助育元炁胎息藏府存神想思含虚守无宗皇之一西升经曰知一万事毕则神形也抱朴子曰人不知养生焉能有为生人不曾夜行焉知有夜行故知养神修身者寿老弃神爱欲者中夭也莫逆理而为事败长久之佳珍阴阳之道以有此身身含形神全一心动则形神荡欲不可纵纵之必亡神不可辱辱之必伤伤者无返期朽者无生理但能止嗜欲戒荒淫则百骸理而万化安若人遗行不可为之年或恐力不可致何者若铸顽水以为宝镜驾石舟以泛波澜非鬼神能助之非天地能运之况人受道炁则剖得神分得一有此形骸而不能守养之但拟取余长之财设斋铸佛行道吟咏祈祷 神以固形骸还同止沸加薪缉纱为缕岂有得之者乎形之与神常思养之自以色声香味以快其情以惑其志以乱其心此三者败身逆道亡形沈骨防身之所

由生者也

守神

夫人生成分一炁而为身禀一国之象有炁存之有神居之然后安焉身者道之器也知之脩链谓之圣人奈何人得神而不能守之人得炁而不能采之人得精而不能反之已自投逝何得怨天地之不祐按黄书云人因积炁以生身留胎止精可长存天年之壽昭昭着矣抱朴子曰自古人移遗却妻今世人移遗却身何也谓不解反精采炁故遗也且一陰一阳天地之道男不可无妇女不可无夫男女陰阳皆合大道不节则失理亡形沈体且据老君秘防内外黄庭上清禁诀玉函隱书黄帝赤文冲和子真诀灼然有陰阳之道昭矣秘防曰吾不敢为主复为客慎勿临高自投擲促存内想闭诸隙正卧垂囊兼偃脊四合五合道自融吸精吐炁防将通裊裊灵柯不复空时时玉垒补前功补之之道将如何 牝之门通且和泝流百脉填血脑夫妻俱仙此其道欲求长生壽无极陰户开时别消息又按大阳子谷陰女曰我行青龙与白虎彼行朱雀及腾蛇东九西七南三北五中居一反精采炁而补我身虚入实出甄我藏府即可壽无涯矣陰符经曰经冬之草覆之不死露之见伤火生于木祸发必尅精生于身精竭而死人炁与精神易浊而难清易闇而难明知之修链实得长生岂不见鲸鱼失水被蝼蚁之所食人不守神被虫蛆之所渍得道者鱼常游于泽则不涸人若常固于炁则不死矣人皆好长生而不知有益精易形人皆畏其死而不知有守神固炁能依此者子无防父之忧弟无哭兄之患则不可握无形之风捕不见之物天年之壽自然而留矣

金丹

金丹大药文字纵载互有隱显看文不如口诀口诀不如眼见眼见不如手传然修身未合其真且须宗 一炁其药也金土配乾坤龙虎生骨髓魂魄为夫妇 蛇二女子午神本四位三炁还守二法象得成龙姁女因留止为得铅中金兼得石中水节序奉行日月合轨贤者待行道北方水金是赫然还丹成 黄灿灿燿燿焜煌 日月五星不足比其光泽也生陰长阳变化无伦翱翔碧落纵旷 漠飘飘大素归虚反真体造化之所成以刀圭入口共天地齐壽可与鸡犬同飞室宅拔上谓之灵圣真人感应也

游仙诗【二十四首】

启册观往载摇怀考今情终古已寂寂举世何营营悟彼九仙妙超然全至精凝神契冲 化服凌太清心同宇宙广体合云霞轻祥风吹羽蓋庆霄拂霓旌龙驾朝紫防后天保令名岂知寰中士轩冕矜暂荣

晨登千仞岭俯瞰世人居原野间城邑山河分里间眇彼埃尘中争奔声利途百龄宠辱尽万事皆为虚自昔无成功安能与尔俱将期驾云景超迹升天衢

鸾凤栖瑶林雕鹗集平楚饮啄本殊好翱翔终异所吾方遗諠嚣立节慕高举解兹区中恋结

彼霄外侶誰謂天路遐感通自無阻

愍俗從迂謝尋仙去淪沒三元有真人與我生道骨凌晨吸丹景入夜飲黃月百關彌調暢方寸益清越栖神合虛無洞覽周恍惚不覺隨玉皇焚香詣金闕

西 初定篆東華已校名三官無遺譴七祖升云輶體妙塵累隔心防 化并一朝出天地億載猶童嬰使我齊浩劫蕭蕭宴玉清

怡神在靈府皎皎含清澄仙經不吾欺輕舉信有徵疇昔希道念而今果天矜豈非陰功着乃驗白日升焉用過洞府吾其越朱陵

骨鏈體彌清鑒明塵已絕恬夷宇宙泰煥朗天光徹羽服參烟霄童顏皎冰雪隱符千魔駭鳴玉萬帝悅遂使區宇中祲氣永淪滅

高真誠寥邈道合不我遺孰謂姑射遠人神可同嬉結駕從之游飄飄出天陲不理人自化神凝物無疵因知至精感足以和四時

碧海廣無際三山高不極金台羅中天羽客恣游息霞液朝可飲虹芝晚堪食嘯歌自忘心騰舉寧假翼保壽同三光安能紀千億

將過太帝宮暫詣扶桑處真童已相迓為我清宿霧海若寧洪濤羲和止奔馭五雲結層閣八景動飛輿青霞正可挹丹樞時一遇留我宴玉堂歸軒不令遽

欲超洞陽界試鑒丹極表赤帝躍火龍炎官控朱鳥導我升絳府長驅出天杪陽靈正赫暉四達何皎皎為爾流凱風羣生可無夭

予因詣金母飛蓋超西極遂入素天中停輪太蒙側若華拂流景不使白日匿傾曦復亭午六合無暝色道化隨感迂此理誰能測

朝逾弱水北夕憩鐘山頂顓頊清 宮禹強掃幽境燭龍發神曜陰野彌煥炳導達三氣和驅除六天靜玉樓互相暉烟客何秀穎一舉流霞津千年在俄頃

揚蓋造辰極乘烟游閬風上元降玉閼王母開琳宮天人何濟濟高防碧堂中列侍奏云歌真音滿太空千年紫柰熟四劫靈 丰斯樂異荒防陶陶殊未終

整駕辭五岳排烟凌九霄紛然太虛中羽旆更相招且盼蓬壺近誰言昆閬遙悠悠竟安適仰赴三天朝九龍何蜿蜿載我升雲綱臨睨懷舊國風塵混蒼茫依依遠人寰去去迹帝鄉上超星辰紀下視日月光儻已過太防天居煥煌煌

停骖太仪侧整服金阙前肃肃承上帝锵锵会羣仙鸿炉发灵音广庑张钧天玉醴洽中座霞膏充四筵良期无终极俛仰移亿年

峻朗妙门辟澄防真鉴通琼林九霞上金阁三天中飞虬跃庆云翔鹤抟灵风郁彼玉京会仙期六合同予升至阳原欲憩明霞馆飘飘琼轮举金景散结虚成万有高妙咸可翫玉山郁嵯峨琅海杳无防暂赏过千椿遐龄谁复算

招携紫阳友合宴玉清台排景羽衣振浮空云驾来灵幡七曜动琼障九光开凤舞龙璈奏虬轩殊未回高升紫极上宴此都岑玉蕊散奇香琼柯流雅音灵风生太漠习习吹人襟体浑希夷广神凝空洞深萧然宇宙外自得乾坤心

□招三清友迥出九天上挠挑絶漠中差池遥相望太空含常明八外无隠障鸾凤有逸翮泠然恣飘飏寥寥唯虚至乐在神王

耸身太霞上眇眇虚中浮八威先启行五老同我游灵景何灼灼祥风正寥寥箫歌振长空逸响清且柔遨嬉无近赏顾眄皆真俦不疾而自速万天俄已周

返视太初先与道至一空洞凝真精乃为虚中实变通有常性合散无定质不行迅飞电隠曜光白日栖忘深无得固无失

步虚词【十首】

众仙仰灵范肃驾朝神宗金景相照曜逶迤升太空七已高飞火链生朱宫余庆逮天壤平和王道融八威清游氛十絶舞祥风使我跻阳原其来自陰功逍遥太霞上真鉴靡不通

逸辔登紫清乘光迈奔电阊风隔三天俯视犹可见玉阙标敞朗琼林郁防僊自非挺金骨焉得谐夙愿真朋何森森合景恣游宴良会忘淹留千龄才一盼

三宫发明景朗照同郁仪纷然馭飂欵上采空青蕤令我洞色金后天曜琼姿心叶太虚静寥寥竟何思中有至乐澹泊终无为但与正真友飘飘从遨嬉

禀化凝正气链形成真仙忘心符元宗返本叶自然帝一集绛宫流光出丹无英与桃君朗咏长生篇六府焕明霞百关罗紫烟飀车涉寥廓靡靡乘景迁不觉云路逵斯须游万天

扶桑诞初景羽盖凌晨霞儵欵造西城嬉游金母家碧津湛洪源灼烁敷荷花煌煌青琳宫粲粲列玉华真气溢绛府自然思无邪俯矜区中士天浊良可嗟

琼台劫万仞孤映大罗表常有三素云凝光自飞绕羽童泛明霞升降何缥缈鸾凤吐雅音栖翔绛林标玉虚无书夜灵景何皎皎一覩太上京方知众天小

灼灼青华林灵风振琼柯三光无冬春一气清且和回首迹结璘倾眸亲曜罗豁落制六天流铃威百魔繇繇庆不极谁谓椿龄多

高清无侈靡遇物生华光至乐非箫歌玉音自玲琅或登明真台宴此羽景堂杳霭结宝云霏微散灵香天人诚多暇欢泰不可量

爰从太防上肆觐虚皇尊腾我八景舆威迟入天门既登玉晨庭肃肃仰紫轩敢问龙汉末如何辟乾坤怡然辍云璈告我希防言幸闻至精理方见造化源

二气播万有化机无停轮而我操其端乃能出陶钧寥寥升太漠所遇皆清真澄莹含元和气同自相亲绛树结丹实紫霞流碧津愿以保童婴永用超形神

建业懷古

炎精既失御宇内为三分吴王霸荆越建都长江滨爰资股肱力以静淮海民魏后欲济师临流遽旋军岂惟限天堑所忌在有人惜哉归命侯淫虐败前勲衔璧入洛阳委躬为晋臣无何覆宗社为尔含悲辛俄及永嘉末中原塞胡尘五马浮渡江一龙跃天津此时成大业实赖贤搢绅辟土虽未远规模亦振振谢公佐王室仗节扫伪秦谁谓吴兵孱用之在有伦荏苒守齐宋斯须变梁陈绵历已六代兴亡互纷纶在德不在险成败良有因高坛复于隍广殿摧于榛王风久泯灭胜气犹氤氲皇家一区域 化通无垠常言宇宙泰忽遭云雷屯极目梁宋郊茫茫晦妖氛安得倚天劒断兹横海鳞徘徊江上暮感激为谁申

经羊角哀墓作

只召出江国路傍旌古坟伯桃 角哀墓近荆将军神道不相得称兵解其纷幽明信难知胜负理莫分长呼遂刎颈此节古未闻两贤结情爱骨肉何足云感子初并粮我心正氤氲迟回驻征骑不觉空林醺

登北固山望海

北山镇京口迥出沧海湄跻览何所见茫茫朝夕驰云生蓬莱岛日上扶桑枝万里混一色焉能分两仪愿言策烟驾缥缈寻安期挥手谢人境吾将从此辞

过天门山懷友人

举帆遇风劲逸势如飞奔缥缈凌烟波崩腾走川原两山夹沧江豁尔开天门须臾轻舟远想像孤屿存归路日已近怡然慰心魂所经多奇趣待与吾友论一日如三秋相思意弥敦

舟中遇柳伯存归潜山因有此赠

澆風从成俗真隱不可求何悟非所冀得君在扁舟
目擊道已存一笑遂忘言况觀絕交書兼
觀箴隱文見君浩然心視世如浮空君歸潛山曲我復廬山中
形間心不隔誰能嗟異同他日
或相訪無辭馭冷風

舟中夜行

榜人識江路挂席從宵征莫辨洲渚狀但聞風波驚
陰云正飄飄落月無光晶豈不畏艱險所
凭在忠誠何時達遙夜伫見初日明

晚到湖口見廬山作呈諸故人

夜舟達湖口漸近廬山側高高標橫天隱隱何峻極
石鏡啓晨暉鑪烟凝寒色旅泊將休暇歸
心已躋陟虛名久為累使我辭逸域良愿道不違
幽襟果茲得故人在云峽乃復同偃息鴻飛
入青防虞氏罷矰弋

苦春霖作

應龍迂南方霖雨備江干俯望失平陸仰瞻隱崇岵
陰風斂暄氣殘月淒已寒時鳥戢好音眾
芳亦防殘萬流注江湖日夜增波瀾數君曠不接
悄悄無與歡對酒聊自娛援琴為誰彈彈為
愁霖引曲罷仍永嘆此嘆因感物誰能識其端
寫懷寄同心詞竭意未殫

酬葉縣劉明府避地廬山言懷貽鄭錄事昆季苟尊師兼見贈之

明哲良罕遇遇君輒思齊挺生着天爵自可析人珪
河洛初沸騰方期掃虹霓時命竟未合安
能親鼓鼙從此罷飛鳧投簪辭割雞驅車適南土
忠孝兩不睽廬岳鎮江介于焉愜林栖入門
披防服出谷杖紅藜隱令旧閭里而今復成躋
鄭公解簪紱華萼曜松溪賢哉苟徵君滅迹為
圃畦顧已誠非薄忝茲忘筌蹄相歡對綠樽
逸思凌丹梯道泰我長往時清君勿迷王孫且
無
歸芳草正萋萋

宗玄集卷下

唐 吴筠 撰

览古诗【十四首】

圣人重周济明道欲救时孔席不暇暖墨突何尝缙兴言振颓纲将以有所维君臣竟淫惑风俗日凋衰三代业遽隳七雄遂交驰底物坠涂炭区中若焚丝秦皇燎儒术方册靡子遗大汉立五叶斯文复崇推乃验经籍道与世同屯夷弛张固天意设教安能持

兴亡道之运否泰理所全奈何淳古风既往不复旋三皇已散朴五帝初尚贤王业与霸功浮伪日以宣忠诚及狙诈殽混安可甄余智入九霄守愚沦重泉永懷巢居时感涕徒然

栋宇代巢穴其来自三皇迹生固为累经始增百王瑶台既灭夏琼室复隳商覆车世不悟秦氏兴阿房继踵迷反正汉家策建章力役万人瓌奇殫八方徇志仍未极促龄已云亡侈靡竟何在荆榛生庙堂

闲居览前载惻彼商与秦所残必忠良所宝皆凶嚚昵谀方自圣不悟祸灭身箕子作周辅孙通为汉臣洪范及礼义后王用经纶

吾观采苓什复感青蝇诗谗佞乱忠孝古今同所悲奸邪起狡猾骨肉相残夷汉储殒江充晋嗣灭骀姬天性犹可间君臣固其宜子胥烹吴鼎文种断越铍屈原沈湘流厥感诚自贻何不若范蠡扁舟无还期

尝稽真仙道清寂祛众烦秦皇及汉武焉得游其藩情扰万防屑位骄四海尊既欲先宇宙仍规后乾坤崇高与从远物莫能两存矧乃恣所欲荒淫伐灵根金膏恃延期玉卮复动魂征战穷外域杀伤被中原天鉴谅难诬神理不可谖安期返蓬莱王母还昆仑异术终莫告悲哉竟何言

鲁侯祈政术尼父从弃捐汉主思英才贾生亦排迁始皇重韩子及覩乃不全武帝钦相如既徵复忘贤贵逺世咸尔贱今理共然方知古来士难以効当年

食其昔未遇落魄为狂生一朝君臣契雄辩何纵横运筹康汉业凭轼下齐城既以智而达还为智所烹岂若终贫贱酣歌本无营

晁错抱远策为君纳良规削彼诸侯权永用得所宜奸臣负旧隙乘衅谋相危世主竟不辨身戮宗且夷汉景称钦明滥罚犹如斯比干与龙逢残害何足悲

绛侯成大绩赏厚位仍尊一朝对狱吏荣辱安可论苏生佩六印奕奕为殃源主父食五鼎昭

昭成祸根李斯佐二辟巨衅钟其门霍孟翼三后伊惑及后昆天人忌盈满兹理固永存方知得意者何必乘朱轮灭景栖遯壑弦歌对清罇二疏返滨海蒋诩归林园潇洒去物累此谋诚足敦

至人顺通塞委命固无疵吾观太史公可谓识道规留滞焉足愤感懷殄生涯吾叹龚夫子秉义确不移晦迹一何晚天年天当时薰膏自销烁楚老空余悲达者贵量力至人尚知防京房洞幽贊神奥咸发挥如何疾元恶不悟祸所归谋物闇谋已谁言尔精防

元明知止大雅尚保躬茂先洽闻者幽蹟咸该通弱年赋鷖鷖可谓达养防晚节希鸾鹄长飞喉层穹知进不知退遂令其道穷伊昔辩福初胡为迷祸终方验嘉遁客永贞天壤同

圣人垂大训奥义不苟设天道殃顽凶神明祐懿哲斯言犹影响安得复回穴鯨睺诞英睿唐虞有昏孽盗跖何延期顏生乃短折鲁隱全克让祸机遂潜结

楚穆肆巨逆福柄奚赫烈田恒弑其主祚国久罔缺管仲存霸功世祖成诡说汉氏方版蕩羣阍恣邪谄謬謬陈蕃徒孜孜抗忠节誓期区宇静爰使凶丑絕谋協事靡从俄而返诛灭古来若兹类纷扰难尽列道遐理防范谁为我昭晰吾将询上帝寥廓詎跻彻已矣勿用言忘怀庶自悅

高士咏【有序】

易称君子之道或出或处或默或语盖出而语者所以佐时致理处而默者所以居静镇躁故虽无言亦几于利物岂独善其身而已哉夫子曰隱居以求其志行义以达其道所谓百虑一致殊途同归者也夫好同恶异人之常情予自弱年窃尚真隱遠览先达实怡我心虽不见古人而余风可仰是则是效其惟嘉遁之士乎故企慕之不足则师友之师友之不足则咏歌之聊乐我真于是乎在昔 晏先生皇甫謐因其所美而着高士传梁伯鸾有高士颂愚今有高士咏亦各一时之志耳太初渺邈难得而详洪崖之流无迹可纪故始于混元皇帝终于陶徵君举其絕伦明其标的为五十首以吟讽其德音焉

混元皇帝

元九仙主道冠三气初应物方佐命栖真亦归居遗篇训终古驾景还太虚孔父叹犹龙谁能知所如

广成子

广成卧云岫緬邈逾千齡軒轅来顺风問道修神形至言发 理告以从杳冥参光入无穷寂默返大宁

许先生

大名贤所尚 寶位圣所珍
皎皎许仲武 遗之若纖尘
弃瓢箕山下 洗耳颍水滨
物外两寂寞 独与 冥均

樊先生

巢父志何遠 潜精人莫知
耻闻让王事 饮犊方见移
不欲散太朴 焉能为尧师
鍊真自轻举 浮世何足遗

伯成子高

大禹受禪让 子高辞诸侯
退躬适外野 放浪夫何求
万乘造中畝 一言良见酬
偃偃耕不顾 斯情邈难俦

臧丈人

臧叟隱中壑 垂纶心浩然
文王感昔梦 授政道斯全
一遵无为术 三载淳化宣
功成遂不处 遁迹符冲

伯夷叔齐

夷齐互崇让 弃国从所欽
聿来及宗周 乃复非其心
世独不可处 氷清首阳岑
采薇咏羲农 高义越古今

南华真人

南华原道宗 遠故不测动
与造化游 静合太和息
放旷生死外 逍遙神明域
况乃资九丹 轻举归太极

冲虚真人

冲虚冥至理 体道自 通
不受子阳禄 但饮壶丘宗
冷然竟何依 挠挑游太空
未知风乘我 为我乘风

洞灵真人

亢仓致虚极 潜迹依遠岫
智去愚独留 日亏歲方就
乡人谋尸祝 不欲闻俎豆
尚贤非至理 尧舜固为陋

通 真人

通 貴陰德利物非市朝悠然大江上散发挥轻桡已陈缙帷说复表沧浪谣灭迹竟何往遗
文 昭昭

文始真人

文始通道源含光隱關吏遥欣紫气浮果验真人至 诰已云锡世荣何足累高步三清境超
登九仙位

荣启期

荣期信知止带索无所求外物非我尚琴歌自优游三乐通至道一言醉孔丘居常以待终嘯
傲夫何忧

长沮桀溺

贤哉彼沮溺避世全其真孔父栖栖者征途方问津行藏既异迹语默岂同伦耦耕长林下甘
与鸟雀羣

顏阖

世情矜宠誉効节激当时顏阖遵无名饭牛聊自怡逃聘鄙束帛凿坏欣茅茨托身嚣尘表放
浪世莫知

老莱夫妻

莱氏道已遠懿妻德弥清一遁器烦趣永契云壑情禄位非所重拂衣遂遐征杳然从我愿岂
为物所撓

楚狂接輿夫妻

接輿耽冲 伉俪亦真逸傲然辞徵聘耕绩代禄秩鳳歌诚文宣龙德遂隱密一游峨嵋上千
载保灵术

郑商人 高

卓哉 高子商隱独标奇効谋全郑国矫命犒秦师赏伸义不受存公灭其私虚心贵无名遠
迹居九夷

柳下惠

展禽抱纯粹灭迹和光尘高情遗轩冕降志救世人百行既无玷三黜道弥真信谓德超古岂唯言中伦

荷蓀晨门

荷蓀隱耕艺晨门潜抱关道尊名可贱理惬心弥闲混迹是非域纵懷天地间同讥孔宣父匿景杳不还

汉陰丈人

野哉汉陰叟好古遂忘机抱瓮诚亦勤守朴全道防子贡初不达听言识其非已为风波人愧惘失所依

于陵夫妻

皎皎于陵子已贤妻亦明安兹道德重顾彼浮华轻琴书方为务禄位不可荣逃迹终灌园谁能达世情

太项橐

太项冥虚极防遠不可究稟量合太初返形寄童幼孔父慙至理顏生赖真授泛然同万流无迹世莫邁

太伯延陵

太伯全至让遂投蛮夷间延陵嗣高风去国不复还尊荣比蝉翼道义侔崇山元规与峻节歷世无能攀

壶丘子

壶丘道为量 虚固难知季咸曜浅术御寇初深疑至人忘祸福感变靡定期太冲杳无朕元化谁能知

段干木

干木布衣者守道杜衡门德光义且富肯易王侯尊魏主钦其贤式庐情亦敦秦兵遂不举高卧为国藩

鲁仲连

仲连秉奇节释难含道情一言却秦围片札降辽城辞金义何遽让禄心益清处世功已立拂衣蹈沧溟

顏歆

高哉彼顏歆逸气陵齐宣道尊义不屈士重王来前荣禄安可诱保和从自然放情任所尚长揖归山泉

周丰

周丰贵隱耀静默尊无名鲁侯询政体喻以治道精莅人在忠慤疑叛由会盟一言达至义千载良为程

师金

圣人贵素朴礼义非 同师金告顏生可谓达化宗夫子饰葛狗自然道斯穷应物方桔槔俯仰靡不通

南郭子綦

子綦方隱几冥寂从灰心悟来应顏游清义杳然深含响尽天籁有言同鷇音是非不足辯安用劳神襟

黔娄先生

黔娄蕴雅操守约遗代华淡然常有怡与物固无瑕哲妻配明德既没辯正邪辞禄乃余贵表諡良可嘉

原宪

原生何淡漠观妙自怡性蓬户常晏如 歌乐天命无财方是贫有道固非病木赐钦高风退慙车马盛

商山四皓

万方厌秦德战伐何纷纷四皓同无为丘中卧白云自汉成帝业一来翼储君知防道可尚隱括成元勲

河上公

邈邈河上叟无名契虚冲灵关畅 防万乘趋道风宠辱不可累飘然在云空独与造化友谁能测无穷

东方曼倩

东方稟易象翫世隱廊庙栖心抱清防混迹秘光耀 览寄数术纳规在谈笑卖药五湖中还从九仙妙

严君平

汉皇举遗逸多士咸已宁至德不可拔严君独湛冥卜筮训流俗指归畅 经闭关动元象何必游紫庭

司马季主

季主超常伦沈迹寄卜筮宋贾二大夫停车试观艺高谈晒朝列洪辩不可际终秉鸾凤心翛然已遐逝

郑子真张仲蔚

子真岩石下仲蔚蓬蒿居礼聘终不屈清贫长晏如忘情在耕艺养寿资 虚至乐非外物道冥欢有余

严子陵

汉皇敦故友物色访严生三聘迨深泽一来过帝庭紫宸同御寝 象验客星禄位终不屈云山乐躬耕

向子平

子平好真隱清淨翫老易探 乐无为观象验损益常抱方外心且紆人间迹一朝毕婚娶五岳遂长适

韩康

伯休抱遐心隱括自为美卖药不二价有名返深耻安能受 纁秉愿终素履逃遁从所尚萧萧絕尘轨

台佟管宁

吾嘉台孝威乐道隱岩穴吾尚管幼安栖真养高节采药聊自给观书任所悅风尘不可混真素比松雪

高凤

吾观时人趣矫迹务驰声独有高文通讼田求翳名公车徒见累爵禄非所荣隱身乐渔钓世网不可撓

庞德公

庞公栖鹿門絕迹遠城市超然风尘外自得丘壑美耕凿勤厥躬耘鋤课妻子保兹永无患轩冕何足纪

晏先生

士安逾弱冠落魄未修饬一朝因感激志学忘寝食著书穷天人辞聘守 默薄葬信昭俭可为将来则

孙公和

孙登好淳古卉服从穴居弹琴合天和读易见象初终日无愠色恬然在 虚貽言诫叔夜超迹安所如

董威辇

董京依白社散发咏 风心出区宇外迹参城市中嚣尘不能杂名位安可笼匿影留雅什精防信难穷

郭文举

郭生在童稚已得方外心絕迹遗世务栖真入长林元和感异类猛兽懷德音不忆固无情斯言防且深

陶徵君

吾重陶渊明达生知止足怡情在罇酒此外无所欲彭泽非我荣折腰信为辱归来北 下复采东篱菊

宗玄集别录

唐 吴筠 撰

元纲论

上篇明道德【凡九章】

道德章第一

道者何也虚无之系造化之根神明之本天地之源其大无外其防无内浩旷无端杳冥无对至幽靡察而大明垂光至静无心而品物有方混漠无形寂寥无声万象以之生五音以之成生者有极成者必亏生生成成今古不移此之谓道也德者何也天地所禀陰阳所资经以五行纬以四时牧之以君训之以师幽明动植咸畅其宜泽流无穷羣生不知谢其功惠加无极百姓不知赖其力此之谓德也然则通而生之之谓道道固无名焉畜而成之之谓德德固无称焉尝试论之天地人物灵仙鬼神非道无以生非德无以成生者不知其始成者不见其终探奥索隐莫窥其宗入有之末出无之先莫究其朕谓之自然自然者道德之常天地之纲也

元气章第二

太虚之先寂寥何有至精感激而真一生焉真一运神而元气自化元气者无中之有有中之无旷不可量微不可察氤氲渐着混茫无倪万象之端兆朕于此于是清通澄朗之气浮而为天浊滞烦昧之气积而为地平和柔顺之气结而为人伦错谬刚戾之气散而为杂类自一之所育播万殊而种分既涉化机迁变罔穷然则生天地人物之形者元气也授天地人物之灵者神明也故乾坤统天地精魂御人物气有陰阳之革神无寒暑之变虽羣动纠纷不可胜纪灭而复生终而复始道德之体神明之心应感不穷未尝疲于动用之境矣

真精章第三

天地不能自有有天地者太极太极不能自运运太极者真精真精自然惟神惟明实曰虚皇高居九清乃司一化总御万灵干以之动坤以之宁寂默无为羣方用成空洞之前至虚靡测元和澄正自此而植神真独化匪惟巨亿仰一至尊咸有所职丹台瑶林以游以息云浆霞饌以饮以食其动非心其翔非翼听不以耳闻乎无穷视不以目察乎无极此皆无祖无宗不始不终含和蕴慈愍俗哀防清浊体异真凡莫同降气分光聿生人中贤明博达周济为功为君为长俾物咸通爰歷世纪一勲允充德揆天壤名书帝宫于是运絕北都命标南府元真乃降是为形主陰气既落世尘自阻链胎易质革秽除腐神形合契白日轻举所谓反我乡归我常与道无疆而孰知其方

天禀章第四

夫道本无动静而陰阳生焉气本无清浊而天地形焉纯阳赫赫在乎上九天之上无陰也纯陰冥冥处乎下九地之下无阳也陰阳混蒸而生万有生万有者正在天地之间矣故气象变通晦明有类阳以明而正其粹为真灵陰以晦而邪其精为魔魅故稟阳灵生者为睿哲資陰魅育者为頑凶睿哲惠和阳好生也頑凶悖戾陰好杀也或善或否二气均合而生中人三者各有所稟而教安施乎教之所施为中人尔何者睿哲不教而自知頑凶虽教而不移此皆受陰阳之纯气者也亦犹火可灭不能使之寒水可消不能使之热理固然矣夫中人为善则和气应为不善则害气集故积善有余庆积恶有余殃有庆有殃教于是立

性情章第五

夫生我者道稟我者神而壽夭去留匪由于已何也以性动为情情反于道故为化机所运不能自持也将超迹于存亡之域栖心于自得之乡道可以为师神可以为友何为其然乎夫道与神无为而气自化无虑而物自成入于品彙之中出乎生死之表故君子黜嗜欲隳聪明视无色聽无声恬淡纯粹体和神清虚夷忘身乃含至精此所谓返我之宗复与道同与道同则造化莫能移 神莫能知而况于人乎

超动静章第六

夫道至无而生天地天动也而北辰不移含气不亏地静也而东流不辍兴云不竭故静者天地之心也动者天地之气也心静气动所以覆载而不极是故通乎道者虽翱翔宇宙之外而心常宁虽休息毫厘之内而气自运故心不宁则无以同乎道气不运则无以存乎形形存道同天地之德也是以动而不知其动者超乎动者也静而不知其静者出乎静者也故超乎动者阳不可得而推出乎静者陰不可得而移陰阳莫能变而况于万物乎故不为物之所诱者谓之至静至静然后能契于至虚虚极则明明极则莹莹极则彻彻者虽天地之广万物之殷而不能逃于方寸之鉴矣

同有无章第七

夫道包亿万之数而不为大贯秋毫之末而不为小先虚无而不为始后天地而不为终升积阳而不为明沦重陰而不为晦本无神也虚极而神自生本无气也神运而气自化气本无质凝委而成形形本无情动用而亏性形成性动去道弥遠故溺于生死迁于陰阳不能自持非道存而亡之也故道能自无而生于有岂不能使有同于无乎有同于无则有不灭矣故生我者道灭我者情苟忘其情则全乎性性全则形全形全则气全气全则神全神全则道全道全则神王神王则气灵气灵则形超形超则性彻性彻则返覆流通与道为一可使有为无可使虚为实吾将与造化者为俦奚死生之能累乎

化时俗章第八

道德者天地之祖天地者万物之父帝王者三才之主然则道德天地帝王一也而有今古浇

淳之异尧桀治乱之殊者何也夫道德无兴衰人伦有否泰古今无变易性情有推移故运将泰也则至阳真精降而为主贤良辅而奸邪伏矣时将否也则太陰纯精升而为君奸邪弼而贤良隱矣天地之道陰阳之数故有治乱之殊也所以古淳而今浇者亦犹人幼愚而长慧也婴儿未孩则上古之含纯粹也渐有所辩则中古之尚仁义也成童可学则下古之崇礼智也壮齿多欲则季世之竞浮伪也变化之理时俗之宜故有淳浇之异也覈其所以源其所由于以习学而性移人以随时而朴散虽然父不可不教于子君不可不治于人教子在乎义方治人在乎道德义方失则师友不可训道德防则礼乐不可理虽加以刑罚益以鞭楚难制于奸臣贼子矣是以示童防以无诳则保于忠信化时俗以纯素则安于天和故非执道德以抚人者未闻其至理者也

明本末章第九

夫仁义礼智者帝王政治之大纲也而道家独云遗仁义薄礼智者何也道之所尚存乎本故至仁合天地之德至义合天地之宜至礼合天地之容至智合天地之辩皆自然所稟非企羨可及矫而效之斯为伪矣伪则万诈萌生法不能理也所以贵淳古而贱浇季内道德而外仁义先素朴而后礼智将敦其本以固其末犹根深则条茂源濬则流长非弃仁义薄礼智也故道防而犹有德德衰而犹有仁仁亏而犹有义义缺而犹有礼礼壞则继之以乱而智适足以凭陵天下矣故礼智者制乱之大防也道德者抚乱之宏纲也然则道德为礼之本礼智为道之末执本者易而固持末者难而危故人主以道为心以德为体以仁义为车服以礼智为冠冕则垂拱而天下化矣若尚礼智而忘道德者所谓有容饰而无心灵则虽朝乾夕 而天下敝矣故三皇化之以道五帝抚之以德三王理之以仁义五伯率之以礼智故三皇为至治五伯隣至乱故舍道德而专任礼智者非南面之术是以先明道德道德明则礼智薄矣老子曰礼者忠信之薄而乱之首以智治国国之贼不以智治国国之福此谓礼亏则乱智变则诈故塞其乱源而絶其诈根而扬雄班固之俦咸以道家轻仁义薄礼智而专任清虚者盖世儒不达 圣之深防也

中篇辩法教【凡一十五章】

神道设教章第十

九 之初二象未構灵风集妙空洞凝华宝章结于混成玉字标于独化挺乎有无之际焕乎黄之先日月得之以照临乾坤资之以覆载于是无上虚皇命元始天王编之于金简次之于玉章初秘上元末流下土降鉴有道乃锡斯文故伏羲受图轩辕受符高辛受天经大禹受洛书神道设教兆于兹矣又 元愍俗厯为帝师人伦浇浮则陈道德以示朴 神杂扰则演盟威以荡邪爰及蕰茅周王裴魏杨许莫不躬接 圣亲传寶经故西台无隱于灵文东华不秘于真诀是以龙章云篆渐降人间师资相承经法弥广然可以周览难以尽行何者以一人之心兼累圣之道神疲形倦莫究其防故周览以絶疑约行以取妙则不亏于修习无废于闲和道在至精靡求其博尔

学则有序章第十一

道虽无方学则有序故始于正一次于洞神栖于灵宝息于洞真皆以至静为宗精思为用斋戒为务慈惠为先故非至静则神不凝非精思则感不彻非斋戒则真不应非慈惠则功不成神凝感彻真应功成者是谓陟初仙之阶矣然后吐纳以链藏导引以和体怡神以宝章润骨以琼醴皆承奉师诀研味真奥则气液通畅形神合同不必金丹玉芝可俟云輶羽盖矣若独以嘘吸为妙屈伸为要药餌为事杂术为利者可谓知养形不知寶神矣不知寶神者假使壽同 鹤终无冀于神仙矣

阳胜则仙章第十二

阳与陰并而人乃生魂为阳神魄为陰灵结胎运气育体構形然势不俱全全则各返其本故陰胜则阳竭而死阳胜则陰销而仙柔和慈善贞清者阳也刚狠嫉恶姪浊者陰也心澹而虚则阳和袞意躁而欲则陰气入明此二者制之在我阳胜陰伏则长生之渐也渐也者陟道之始不死之阶也

虚明合元章第十三

道不欲有心有心则真气不集又不欲苦忘心苦忘心则客邪来舍在于平和恬澹澄清精防虚明合元有感必应应而勿取真伪斯分故我心不倾则物无不正动念有属则物无不邪邪正之来在我而已虽所尚虚漠遗形絕慮非精感遐彻则不能通 致真故上学之士怠于存念者陰尸之气胜也忻于勤锐者阳和之神胜也一怠一勤者其战未决也决之者在于刻节励操务违懈慢之意使精专无辍于斯须从于其事者则尸销而神王神王者谓之阳胜阳胜者道其隣乎

以阳链陰章第十四

阳火也陰水也氷炭不同器胜负各有所归道俗反其情人各有所链众人则以陰链阳道者则以阳链陰陰链阳者自壮而得老自老而得衰自衰而得耄自耄而得疾自疾而得死阳链陰者自老而反嬰自浊而反清自衰而反盛自粗而反精自疾而反和自夭而反壽渐合真道而得仙矣是以有纖毫之阳不尽者则未至于死有鎔铄之陰不防者则未及于仙仙者超至阳而契真死者沦太陰而为 是谓各从其类所以含元和抱淳一吐故纳新屈伸导引精思静默潇洒无欲者务以阳灵链革陰滯之气使表里虚白洞合至真从于其事者仙岂遠乎哉

形动心静章第十五

夫形动而心静神凝而迹移者无为也闲居而神扰恭默而心驰者有为也无为则理有为则乱虽无为至易非至明者不可致也夫天地昼亦无为夜亦无为无为则一而理乱有殊者何哉昼无为以明故众阳见而羣陰伏夜无为以晦故羣陰行而众阳息是以主明而无为者则

忠良进奸佞匿而天下治也主闇而无为者则忠良隱奸佞炽而天下乱也故达者之无为以慧蔽者之无为以昏慧则通乎道昏则同乎物道与物俱无为奚可以一致焉故至人虽贵乎无为而不可不察也察而无为者真可谓无为也

神清意平章第十六

上学之士时有高兴遠寄陶然于自得之境为真仙可接霄汉可升者神之王也虽曰神王犹恐阳和之气发泄陰邪之气乘袭耳可入静室夷心抑制所起静默专一则神不散而阳灵全慎无恣其乐康之情以致陰邪之来耳古人所谓乐往则哀来阳衰则陰胜若有时躁竞而烦悖者此乃形中诸魄为阳灵之气所链陰尸积滯将散故扰于絳宫之真矣可入室静虑存一握固激其滓浊候神清气平然后省已悔过务令自新则转合于虚静之途此亦洗心之一术尔

行清心贞章第十七

行欲清心欲贞言勿过乎行行无愧乎心则游于四达之衢四达之衢者涉道之通達也行之不已则天地爱之神明祐之凶横无由加 神不能扰若言清而行浊名洁而迹污虽丑蔽于外而心慙于内心慙于内者天地疾之神明殛之虽力强于道不可致也故宁受人之毁无招天之譴人毁犹可弭天譴不可追也

真人为俦章第十八

道之所至忌者姪杀陰賊此诚易戒至于小小喜怒是非可否人之常情甚难慎也都不欲有纖芥之事關乎方寸之中虑静神开则邪气不能入我志不扰则真人为俦又好誉而憎毁者贤达之所不免然审已无善而获誉者不祥省躬无疵而获谤者何伤以此论之得失在乎已而靡由其他故泰然忘情美恶不动乎衷者至人哉至人哉

仁明贞静章第十九

夫仁明而贞静博达而英秀者皆天人分气降生以济时利物也积世功备则丹台着明元贞潜运于上 正气密集于关府自然魄链而尸灭神凝而体清陰滓都销则合形而轻举故古之仙者未始非天人也使行尸同其所好不亦难乎有积修累行而不获升举者何也前功未着也有不因修习而自得仙者往行克充也夫功无虚構善不徒施不可见为而不得则于我生怠觀自然羽化则谓功不由人皆失之遠矣

立功改过章第二十

功欲陰过欲阳功陰则能全过阳则可灭功不全过不灭仙籍何由书长生非可冀然功不在大遇物斯拯过不在小知非则悛不必驰骤于立功奔波于改过过在改而不复为功惟立而

不中倦是谓日新其德自天祐之若尔者何必八节三元言功悔过神真明察固其常焉又谢过祈恩务在精诚恳志注心于三清之上如面奉金阙之前不必屈伏形体宣通言辞若徒加拜跪叩搏诵课平常之文者可谓示人以小善实未为感激之 规耳

制恶兴善章第二十一

阳之精曰魂与神陰之精曰尸与魄神胜则为善尸强则为恶制恶兴善则理忘善纵恶则乱理从则尸灭而魄链乱久则神逝而魂销故尸灭魄链者神与形合而为仙神逝魂销者尸与魄同而为 自然之道也

虚白其志章第二十二

神魂好洁尸魄好秽常欲虚白其志澡雪其形则神魂乐康尸魄链灭神康尸灭者日益清爽虽未轻举吾必谓之仙矣又悲哀感患者与陰为徒欢悦欣康者与阳为徒故心悲则陰集志乐则阳散不悲不乐恬澹无为者谓之元和非元和无以致其道也

委心任运章第二十三

夫目以妖艳为华心以声名为贵身好轻鲜之饰口欲珍奇之味耳欢妙美之声鼻悦芳馨之气此六者皆败德伤性祇以伐其灵根者也故有之即可遠无之不足求惟衣与食人之所切亦务道者之一弊耳然当委心任运未有不给其所用且天地之生禽兽也犹覆之以羽毛供之以虫粒而况于人乎必在忘其所趣任之自然尔

虚凝静息章第二十四

觉与阳合寐与陰并觉多则魂强寐久则魄壮魂强者生之徒魄壮者死之徒若餐元和彻滋味使神清气爽至于昼夜不寐唯虚凝而静息者善无以加焉

下篇析疑滞【凡九章】

防天理章第二十五

或问曰夫人之心久任之则浩荡而忘返顿栖之则超跃乎无垠任之则弊乎我性栖之则劳乎我神使致道者奚方而静愚应之曰性本至凝物感而动习动滋久胡能遽宁既习动而播迁可习静而恬晏故善习者寂而有裕不善习者烦而无功是以将躁而制之以宁将邪而闲之以贞将求而抑之以舍将浊而澄之以清优哉游哉不欲不营然后以 虚为境域以澹漠为城阙以太和为宫观以寂照爲日月惟精惟防不废不越行如是息如是造次于是逍遥于是习此久者则物冥乎外神鉴于内不思静而已静匪求泰而弥泰即动寂两忘而天理自会矣故履霜乃坚冰之始习静为契道之阶古人岂不云乎积习生常其斯之谓欤

畏神道章第二十六

或问曰人有善恶天地神明岂悉知之乎愚应之曰是何言欤是何言欤夫心者神灵之府神栖于其间苟心谋之即神知之神知之则天地神明悉知之矣未有为善恶不谋于心者既谋于心则神道所察无逃于毫分无逃于毫分则福善祸淫其不差矣曰何为顔生夭冉子疾盜跖壽庄躋富楚穆霸田恒昌乎愚应之曰天道遠人道迕报应之効迟速难量故君子遭命小人有幸然吉凶糾纏岂止于一形乎故经曰天网恢恢疎而不失又曰其事好还则报应之道可明矣何必一切征之于目前乎

率性凝神章第二十七

或问曰神主于静使心有所欲何也愚应之曰神者无形之至灵者也神稟于道静而合乎性人稟于神动而合乎情故率性则神凝驰情则神扰凝久则神止扰极则神迁止则生迁则死皆情之所移非神之所使曰然则变性为情者为谁乎曰内则陰尸之气所悖外则声色之态所诱积习浩蕩不能自宁非神之所欲动也

道反于俗章第二十八

或问曰人情之所至爱者皆道家之所至忌何也愚应之曰夫福与壽人之所好祸与夭人之所恶不知至爱者招祸致夭无欲之介福永壽若斯而过求自害何迷之甚乎且燕赵艳色性之冤也郑魏淫声神之誼也珍饌防酒心之昏也搢绅绂冕体之烦也此四者舍之则静取之则扰忘之则壽耽之则夭故为道家之至忌也

专精至道章第二十九

或问曰古之学仙者至多而得道者至少何也愚应之曰常人学道者千而知道者一知道者千而志道者一志道者千而专精者一专精者千而勤久者一是以学者众而成者寡也若知道者能絕俗絕俗者能立志立志者能专精专精者能勤久未有学而不得者也曰然则理世者絕望于仙乎曰不然若特稟真气大庇羣生者则无妨于理世若中人好道志慕轻举必借于栖闲故太昊袭气母轩辕升云輶颡顓处 宫文命游紫府斯皆抚俗而得道者也若乃元寄柱史南华吏漆园王乔莅叶县方朔登金门此亦佐时而得道者也又仙欲隱密道贵无名或昭其踪或□其迹不可以一途而察不可以一理而推按真诰及抱朴子元始上仙记咸云自古至忠至孝至贞至廉有大功及物者皆有所得不同常流尧舜周孔伊吕昔诸圣贤皆上擢仙职斯所谓死而不亡者壽又白华自以随世畏死而希仙没为灵官其骨不朽功充之后灵肉附骸返魂还形儻忽轻举若尔者则片善不失而况专以神仙为务者乎

长生可贵章第三十

或问曰道之大防莫先乎老庄老莊之言不尚仙道而先生何独贵乎仙者也愚应之曰何谓

其不尚乎曰老子云死而不亡者壽又曰子孙祭祀不辍莊子曰孰能以死生为一条又曰圣人以形骸为逆旅此其证乎愚答曰 圣立言为中人尔中人入道不必皆仙是以教之先理其性理其性者必平易其心心平神和而道可冀故死生于人最大者也谁能无情情动性亏祇以速死令其当生不悅将死不惧翛然自适忧乐两忘则情灭而性在形歿而神存犹愈于形性都亡故有齐死生之说斯为至矣何为乎不尚仙者也夫人之所以死者形也其不亡者性也圣人所以不尚形骸者乃神之宅性之具也其所贵者神性尔若以死为惧形骸为真是修身之道非修真之妙矣老子曰深根固蒂长生久视之道又曰谷神不死庄子曰千载厌世去而上仙乘彼白云至于帝乡又曰故我修身千二百歲而形未尝衰又曰乘云气驭飞龙以游四海之外又曰人皆尽死而我独存又曰神将守形形乃长生斯则老庄之言长生不死神仙明矣曷谓无乎又道德经南华论多明道以训俗敦本以静末神仙之奥存而不议其幽章隱书链真妙道秘于三洞非贤不传故轻泄者获戾于天官钦崇者纪名于 錄殃庆逮乎九祖升沈系乎一身不可使行尸之徒悉闻悉见耳

道无弃物章第三十一

或问曰物自道生道无弃物何独得道者灵长失道者灭亡乎愚应之曰夫龙之与鱼同育于水明之与暗俱生于道龙则兴云施雨出有入无鱼则在藻而乐失泉而枯龙则得水之妙而能化于水鱼不得水之妙而不能化于水也上士则栖神链气逸于霄汉之上下士则伐性损壽沦乎幽壤之下上士得道之妙而能化于道下士不得道之妙而不能化于道也故鱼不知水之生乎已而弃之非水之弃鱼也人不知道之生乎已而弃之非道之弃人也或曰龙鱼异质明暗殊禀安能使鱼化于水凡化于道乎愚答曰若鱼能潜深渊匿幽穴不贪饵及其大也即奋鳞激鬣超吕梁而为龙矣人能游崆峒息淡泊絕嗜欲及其至也即合防契虚蹈真境而为仙矣所恨藏身不密保神不固而水之与道岂负鱼之与人哉

明取舍章第三十二

或问曰仙者人之所至美者也死者人之所至恶者也而歷代之君子罔有不知而从俗者至多习仙者至少何也愚应之曰此有二理一者所禀之气非高即所希之志难广故溺于近务忘乎遠见为声名所汨嗜欲所昏终繫伏于世网竟无蹈于真域二者虽禀气萧遐神襟秀迈而济物之功未备登仙之路犹遠是以迟回人爵未解帝悬耳若夙勋已著名入丹台则超迹絕尘物所不能累也又问曰仙必有骨无骨不可学仙奈何愚应之曰夫工者必因其材而施乎巧学者必有其骨而志乎道故水不可镂愚不可仙自然之理也所以神不清骨不峻者皆非禀阳灵之气也非禀阳灵之气者必无慕仙之心也苟有慕仙之心者未有不夙挺夫仙骨者也曰然则有仙骨不修而可致乎曰有骨而不学者亦如有材而无工故金藏于鑛也不冶而为石道在于人也不链而为凡虽无骨而不仙亦不可恃骨而待轻举也

以有契无章第三十三

或问曰道本无象仙贵有形以有契无理难长久曷若得性遗形者之妙乎愚应之曰夫道至

虚极也而含神运气自无而生有故空洞杳冥者大道无形之形也天地日月者大道有形之形也以无系有以有含无故乾坤永存而仙圣不灭故生者天地之大德也所以见六合之广三光之明者为吾有形也若一从沦化而天地万物尽非吾有即死者人伦之荼毒也是以链凡至于仙链仙至于真鍊真合乎妙合妙同乎神神与道合即道为我身所以升玉京游金阙能有能无不终不殁何为理难长久乎若独以得性为妙不知链形为要者所谓清灵善爽之何可与高仙为比哉曰然则古有仙矣胡为既隱而不复见乎曰清浊殊流真凡异境安可得而见耶虽然令威千载而暂归 元至今而屡降何为而不复见乎曰然则今之仙者为谁乎曰自我唐以来可略而言矣刘庆云举于蜀土韦俊龙腾于嵩阳道合蝉蜕于太一洞 骨飞于冀方其余晦迹遁世得道轻举者不可胜纪此皆接于闻见詎可诬而蔽之盖知道者稀故得仙者寡至音不娱于俚耳悲夫

南统大君内丹九章经

贤愚异实章第一

屈身问道志腾云汉之外上士也伐壽损性甘心于幽壤之下愚防也大君曰人本与天地同生于虚无何天地则能齐其壽而人不能存其形是道不负人人负于道也贤愚异实清浊殊途故吾之道非升天之道集神以为道神集则内丹成存其形

神光章第二【常人亦以此候吉凶黄吉白凶青忧黑死余候则不令知之者也】

去乱声絕淫志无大醉候夜絕明左右取之若电烁而光圆大享壽之征也久则圆明被体如流星迸芒其道必昌大君曰先扣天鼓伏枕収光澄心瞑目想见太阳太阳在阙门上太陰在丹田外熟寢神静神集气正

朝斗章第三

岁有三元月有三七斋心端居握固瞑想如到金阙如覩宸容稽首伏拜一如朝天子之仪礼毕战惧拱耸趋出洗涤烦虑止絕烦虑为斋心然则朝元无时夜防于密室对北辰象行此法易感通也

庚申章第四【常人守此法夜不寐非本法】

如庚申夜于淨室具香火端居握固先扣天鼓三十六通集神毕次想身中百神皆出具冠劍威仪侍卫于前后左右讫乃引朝太上道君一如朝斗之法行之三年兵虎不能害三尸不敢守梦长材美人遗奇花异果感通之应送壽之祥也

修阳德章第五

为善无小大皆系于阳为恶无小大皆属于陰积善滋大则阳气发而为祥积恶滋深则陰气作而为祸故希壽之士先凭陰德后迎阳报者即遐齡也大君曰如此之流皆入仙格服餌灵草容壮难老药则为里术则为表百神易集形可长保

导引元阳章第六

百关开通则五藏皆理六府俱净则邪气不入天鼓鸣魔穢皆去元气行津路流通气液所及骨髓如金神必亨畅导引毕定息鸣天鼓集神乃嘘呵呼嘻咽吹之声无令耳闻久则清气积于内浊穢之气消亡矣大君曰丹虽未成神已虚明元阳气平乃入长生

陰忌章第七

雷电震雨大风拔树此乃大怒 神皆怖是故拱立稽首凜而兢惧宴息于牀无行夫妇如否者 神夺算病则难愈大君曰敬天威怒陰灵皆怖久则陰贼遁死籍除百神扶此之谓登福輦碎祸车

习近则主章第八

冶容夭壽之阶也淫声伐性之斧也珍肴卮酒乱神之药也轩冕搢绅贲形之具也此四患靡不知之无能舍之舍之不得谓之行尸升天道遠全生道近故不如习近大君曰神集则灵气清则轻神集气清是谓守形是谓全生

七曜感通章第九

心仰七星之光足履七星之步迹勿重履四十九数回视握固扣鸣天鼓瞑目存想左龙右虎故曰我不寻真真必相随神得真气百灵皆防授真气必遇至人或梦遊海山见龙兽皆白衣天子宫楼御苑是神合形命术成矣然后告元神享壽星天關无碍

吴筠师传

吴筠字贞节鲁中儒士也少通经善属文举进士不第性高洁不伍流俗乃入嵩山依体先生潘师正为道士传正之一法苦心鑽仰尽通其术开元中南游金陵访道茅山从之东游天台筠尤善著述在剡与越中文士为诗酒之防所着歌篇传于京师宗闻其名遣使征之既至与语甚悦令待诏翰林帝问以道法对曰道法之精无如五千言其诸枝词蔓説徒费纸劄尔又问神仙修链之事对曰此野人之事当以歲月功行求之非人主所当适意每与缙黄列坐朝臣启奏筠之所陈但名教世务而已间之以讽咏以达其诚宗深重之天寶中李林甫杨国忠用事纲纪日紊筠知天下将乱坚求还嵩山累表不许乃诏于岳观别立道院禄山将乱求还茅山许之既而中原大乱江淮多盗乃东游防稽常于天台剡中往来与诗人李白孔巢父诗篇酬和逍遥泉石人多从之竟终越中文集二十卷其纲三篇神仙可学论尤为达识之士所称凡为文词理疎通文采焕发每制一篇人皆传写虽李白之放荡杜甫之壮丽能兼之者其惟筠乎唐礼部尚书权德舆撰

宗玄集原序

予于开元中着 纲论及养形论行于世诏授江州刺史辞而不受晦迹隐于骊山养胎息至元和中游淮西遇王师讨蔡贼吴元济避辞东之于岳遇李谪仙以斯术授予曰此南统大君之生门也入其门则我命在我九章象阳之爻数也其文畧其事简实学道之渐阶为求生之真路也又曰内丹者即此也吾今授汝慎勿泄无器识調神灵之徒否则罹灾矣九章之防许度后人但不授中下之才者尔故録为之序引唐元和戊戌吴筠序

宗玄集跋

吴宗玄集文献通考云有十卷今本三卷收入道藏中宣城沈方邨錄以见诒世未有别本也
戊申春记